

## **Teks Ucapan**

**PROF. DATUK DR. MOHD HARUN BIN ABDULLAH  
NAIB CANCELOR UNIVERSITI MALAYSIA SABAH**

**SEMPENA  
MAJLIS PERASMIAN PROGRAM INOVASI SOSIAL MOSTI  
(MSI) : OPS JELAJAH CYBER EDISI SABAH**

**PADA  
18 MEI 2017 (KHAMIS) / 8.30 PAGI  
BILIK KULIAH 1, PUSAT PERSEDIAAN SAINS DAN  
TEKNOLOGI (PPST), UNIVERSITI MALAYSIA SABAH,  
KOTA KINABALU**

---

Assalamualaikum warahmatullahi wabarakatuh,  
Salam sejahtera dan Salam Negaraku Malaysia

**(Salutasi)** – [akan dimuktamadkan kemudian]

Alhamdulillah, marilah kita merafakkan setinggi-tinggi kesyukuran ke hadrat Allah S.W.T, kerana dengan limpah rahmat dan kurnia-Nya, maka dapat kita bersama-sama berhimpun pada pagi yang berbahagia ini sempena **Majlis Perasmian Ops Jelajah Cyber Edisi Sabah.**

Saya difahamkan bahawa program ini adalah anjuran Kementerian Sains Teknologi & Inovasi (MOSTI) melalui CyberSecurity Malaysia dengan kerjasama Puspanita dan Universiti Malaysia Sabah.

Pada kesempatan ini, saya ingin mengucapkan jutaan terima kasih kepada semua pihak yang telah terlibat dalam menjayakan program Ops Jelajah Cyber Edisi Sabah ini.

## **Tuan-tuan dan puan-puan yang dihormati sekalian,**

Isu mengenai keselamatan siber adalah merentasi semua sektor dan semua lapisan pengguna internet. Oleh itu, semua pihak termasuklah sektor kerajaan, swasta, Badan Bukan Kerajaan (NGO) dan komuniti perlu memainkan peranan masing-masing untuk memastikan keselamatan siber dapat ditangani dengan berkesan melalui cara yang bersepadu.

Saya ingin mengambil kesempatan ini mengucapkan syabas kepada MOSTI dan rakan strategik Program MSI Ops Jelajah Cyber Edisi Sabah yang telah bekerjasama untuk menjayakan program ini. Usaha sedemikian adalah selaras dengan pendekatan National Blue Ocean Strategy (NBOS) kerajaan yang mana kaedah kerjasama bersepadu yang kreatif telah dibentuk untuk mewujudkan nilai yang tinggi dalam menangani isu keselamatan siber.

Saya juga ingin mengucapkan tahniah kepada Kementerian Sains, Teknologi dan Inovasi (MOSTI) atas inisiatif yang berterusan dalam memacu agenda sains, teknologi dan inovasi (STI) negara.

**Tuan-tuan dan puan-puan yang saya hormati sekalian**

Momentum agenda STI negara semakin rancak melalui penganjuran pelbagai program bagi mengisi Dekad Inovasi (2010 - 2020). Ini termasuklah program-program khusus berkaitan pembangunan dan penerapan budaya STI di peringkat akar umbi.

Dalam hal ini, saya berpandangan bahawa Program Inovasi Sosial MOSTI diperkenalkan tepat pada waktunya kerana ia merupakan salah satu cabang inovasi yang boleh membawa impak secara langsung dan boleh dirasakan oleh rakyat.

Bukan sahaja dapat memberi manfaat kepada masyarakat tetapi juga meningkatkan keupayaan individu untuk bertindak melalui jaringan kerjasama dengan pelbagai pihak.

Selain itu, ianya juga merupakan salah satu usaha bagi membantu masyarakat mengatasi masalah yang dihadapi serta dalam masa yang sama, dapat meningkatkan ekonomi dan kesejahteraan hidup mereka melalui pelaksanaan projek perkhidmatan, peningkatan kemahiran atau hasil inovasi yang boleh dilaksanakan secara mampan.



**Tuan-tuan dan puan-puan yang dihormati  
sekalian,**

Aspirasi kerajaan adalah untuk mencapai matlamat menjadikan Malaysia sebagai sebuah negara maju yang berpendapatan tinggi, mampan dan terangkum. Dalam usaha ke arah mencapai matlamat tersebut, tentunya pelbagai program serta inisiatif telah dan sedang dibangunkan oleh Kerajaan Persekutuan dan juga Kerajaan Negeri. Ini termasuk usaha memperkemaskan sistem pertahanan siber negara.

Di Malaysia, kita amat bertuah kerana kerajaan amat menitik berat mengenai hal ehwal keselamatan siber. Maka, CyberSecurity Malaysia diwujudkan sebagai pusat pakar serta rujukan mengenai isu-isu berkaitan keselamatan siber. Saya difahamkan bahawa, semenjak penubuhan CyberSecurity Malaysia, pelbagai usaha berkaitan aspek e-keselamatan nasional diperkenalkan selain menyediakan perkhidmatan kepakaran berkaitan bidang keselamatan siber.

Dalam hal ini, saya ingin mengucapkan syabas dan tahniah kepada CyberSecurity Malaysia atas perkhidmatan yang diberikan kepada rakyat dan negara amnya.

**Tuan-tuan dan puan-puan yang dihormati  
sekalian,**

Bersempena dengan program **Ops Jelajah Cyber Edisi Sabah** ini juga, satu program latihan teknikal dan keusahawanan turut diadakan.

Program selama dua (2) hari ini adalah amat istimewa kerana ia bertujuan untuk menyedarkan kita, bahawa dunia telah berubah menjadi digital dan kita perlu memperkasakan diri dengan menimba ilmu berkaitan kehidupan yang serba digital.

Sehubungan itu, saya menyarankan agar orang ramai dapat datang beramai-ramai ke program ini, serta mengambil manfaat daripadanya.

Sesungguhnya, ilmu yang bakal diperoleh dengan menghadiri program yang dianjurkan ini akan dapat menjadi bekal yang terbaik bagi mendepani isu-isu semasa yang berkaitan dengan alam siber di negara ini.

Dengan ini, kita akan menjadi lebih peka terhadap apa juga gejala yang melanda, melalui ancaman siber dengan penuh kesiapsiagaan dan menanganinya dengan lebih bijaksana, berhemah dan bertanggungjawab, insya-Allah.

**Tuan-tuan dan puan-puan yang saya hormati sekalian.**

Sebelum mengakhiri ucapan, sekali lagi saya ingin merakamkan ucapan penghargaan kepada Kementerian Sains, Teknologi dan Inovasi (MOSTI) bagi inisiatif berterusan melalui Program Inovasi Sosial MOSTI serta CyberSecurity Malaysia di atas usaha yang berterusan dalam membudayakan penggunaan internet secara berhemah, positif dan beretika.

Sekian, wabillahi taufiq wal hidayah,  
wassalamualaikum warahmatullahi wabarakatuh.